

Ils Movis ein anavos

Treis onns suenter las davosas presentaziuns ein ils Movis anavos sin tribuna en halla Cons a Mustér. Era els han stuii desister avon dus onns ed igl onn vargau da presentaziuns publicas pervia dalla pandemia. En quella fasa pauc emperneivla per tuts ei il diember da participontas e participonts dils Movis sereducius marcantamain. Proximamein sepresentan rodund 60 en pliras gruppas al publicum. (fmr/hh)

Pagina 3

Puspei moviment e sault suenter dus onns pausa sfurzada

Sco a biaras autras uniuns ed organisaziuns ha la pandemia era fatg in steh atras il quen als Movis a Mustér. Proximamein sepresentan els puspei alla tribuna. El decuors dalla pandemia ei il diember da saltunzas e saltunzs sereducius fetg, tonaton ei la menadra Esther Hendry-Decurtins optimista pigl avegnir.

HANS HUONDER/FMR

Moviment e sault. Quei ei il motto principal che dat era il num als Movis. Moviment sco sault ein denton vegni alla cuorta ils davos dus onns. «Nus havevan preparau in grond program pil giubileum da 20 onns igl onn 2020. Paucas jamnas avon che nus presentien quel ein las restricziuns en connex cul coronavirus vegnidas introducidas», di *Esther Hendry-Decurtins* ch'ei era stada confundatura dalla gruppa. Sco avon dus onns ha ei lu era dau neginas presentaziuns igl onn vargau, ils exerchezis han medemamein buca saviu vegnir organisai regularmein. Per part ei vegniu exercitau cun mascherinas e secapescha culla distanza pretendida.

Biars han calau

Per las presentaziuns pil giubileum da 20 onns eran 134 affons, giuvenils e carschi sepreparai. Allas duas presentaziuns che han liug ils 9 e 10 d'avrel 2022 ein aunc 60 saltunzas e saltunzs dalla partida: «Nus enconuschin buca ils motivs daco che tons han calau. Forsa eis ei la mal-

segirtad che regia aunc adina concernent il coronavirus ni la cumadeivladad ch'ei sederasada tier enqualin en quei temps. Plirs han denton era calau perquei ch'els han entschiet in emprendissadi ni ina scolaziun ordeifer. Secapescha che nus sperein che quei semida puspei.» Mo buca mo la pandemia dat da slignar als Movis sco a biaras autras organisaziuns culturalas e dil sport: «Nus sentin secapescha era la demografia negativa. Igl ei semplamein pli paucs affons ch'avon onns.» Mo era sil sector dils Movis – moviment e sault – dat ei tendenzas: «Entgins onns ei quell'activitad pli tschercada, auters onns dameins. Ei sedattan spert gruppaziuns che s'interesseschan lu per quei ni tschei sport.»

Siat gruppas sepresentan

Al program che vegn presentaus uonn separticipeschan siat gruppas, leutier la gruppa da Movis Gym. Als Gyms separticipeschan era entgins buobs, allas autras gruppas spirontamein buobas e giuvnas. Il program ei formaus cumpleinamein da niev naven dalla coreografia, la musica tochen tiels costumes. Muort il pli pign diember

da participontas e participonts ei il diember da presentaziuns vegnius scrusanius uonn da treis sin duas: «Pli paucs participonts munta era pli paucs parents ed enconuschents. Leutier savein nus aunc buca co la gliעד ei promta da visitar arranschaments publics.» In tiarza presentaziun – l'emprova generala il venderdis sera – astgan scolarets e scolars dalla primara visitar gratuitamein. Inklusiv las otg menadras ein rodund 30 persunas engaschadas era uonn vid l'organiziun ed il menaschi dalla fin d'jamna da presentaziun. «Tuttas participontas e tuts participonts ein plein fiug e spetgan vess sillas presentaziuns vegnentas. Igl ei bi che nus savein puspei musar tgei che nus havein exercitau», di la menadra.

Optimists pigl avegnir

Per Esther Hendry-Decurtins ch'ei sescolada successivamein sil sector dil moviment e sault e ch'ei dapresent lundervi da frequentar in cuors davart «sault – qualitat – funcziun» a S. Gagl, eis ei grev da dir co ei va vinavon culs Movis: «Suenter la pandemia eis ei ussa l'uiara ell'Ucraina. Ils prezis per carburont creschan e quei sa-



Ensemèn cul team da menadras ha Esther Hendry-Decurtins semtgau in bi program per uonn.

FOTO HANS HUONDER

vess esser in problem per exempel per quellas e quels che rivan cun auto d'ordeifer a nos exercizis. Quei ei puspei novas temas ch'engrevieschan la veta dil mingadi.» Als Movis separticipeschan numnadamein affons e giuvenils da Trun entochen Tujetsch. Tonaton ei la menadra optimista e perschuada che la puschida dils Movis ei da grond'impurtonza: «Nus lessen porscher zatgei per vegnir sin auters patratgs. Mo lu era per far zatgei communablamein pil tgierp. Enteifer las gruppas sedattan era impurtonts contacts che semantegnan era suenter l'actividad els Movis.» Impurtont seigi ei gnanc cons che selaschien inspirar da quell'actividad, mobein che quels, che separticipeschien, hagian plascher. Pigl onn vengnent ha Esther Hendry danovamein in bien team da menadras.

Las presentaziuns dils Movis han liug sonda, ils 8 d'avrel 2022 allas 20.00 e dumengia, ils 10 d'avrel 2022 allas 14.00 ella halla Cons a Mustér.